

## **PATHIAN KOCHUAMTE.**

“Zia Suangpi chung ahin, ka Kochuam te lemtou ingka” Mt. 16:18. “Pathian Kochuam a thisan ah a leite” Ns. 20:28.

“Kochuam” ti min hi Mt. 16:18, hi alat masakna pen ahi’n, amasang in zia min hi a mang ngai puau. Atukpi vang chu Hebrai pau ah chun a tam khawp mai, Mosia Lekhabu ah te leh Zawlnei Lekhabu ah te alang tam hi. “Pathian mitel” te “Pungkhawm: te tite, “Israel khua leh tui” tite hi Pathian mite genna ahin, “Kochuam” tina gual deu ma ahi.

Chun, “Kochuam” ti min lang chia mou maleh, Pathian in Israel mite chu a Kochuam chei in a chei sek ahi. A Suantu Abraham, Ur khua apat a kou daw ziaka khan, Abraham chu Kochuam masapen ahi ati sek ua, a suante le pathian in Kochuam chei in a chei ta zel ahi.

Chun, Pathian in Abraham ma inle mitel a nei sek hin alanga, Abraham nungram vang ahin ami leh milote chu a khen chuam ta mama in alang. Abraham suan chiat chiata le Isak suante chu ami te ah ngai diak. Ismael suante chu ami te ah a ngaipuai. Chun Isak suan ah le Cha Upazaw Esau suante chu amite ah a ngai puau, Jakob suante bep ami te ah a ngai ahi. Jakob suante chu a Kochuam chei in a chei ta bik a, alak un, Zawlneite a sawl ah, a dawizawng-leh-a dawilozawng te chu zawlnei kam in ahilzel ahi.

A gitlo deu uh leh a gawta, a phat deu uh leh a malzawl a, Khawvel a mihing dang zosia sangin amau chu a enkawl ngun diak ahi. Tichun “Israel khua-leh-Tui” ati teu hi “Pathian Kochuam” ti minvua hilo maleh Pathian Kochuam chu ahi ngei mai ui –a kiangun Thuthung te a kawl saka, kithawidan bangkim te apia, a Zilti ngun mama ahi. A kiangun a dawil-leh-dawilozawng ahil mai hilou in a thuguk, a thilbawl tup, Khawvel a chamna Lal hung piang ding thu te le ahil vek ahi.

Tichun, “Pathian in bang hun lai inle leichung ahin, Kochuam anei ahi” tihi dikthei ina. Lustra khua mite kianga “Pathian chu, ama hetu umlo in a kisiam puan, chutichun thil ahi phasek” Paul in a ti gual in, Pathian in leichung ah hin mi a nei ah “Kochuam” tia vua hikhel lo maleh “Pathian mite” ti leh “Pathian Kochuam” ti chu thumun ahi.

Abraham damlai ah khanle kuama Pathian he mi umlo ahi dia aw.... Iti maithei a, :Melkisedek, Salem lal, Pathian chungnungpen Thiampu” atiu chu ala um guzing ahi.

Ahileh Jesu’n, “Zia Suangpi chung ahin, ka Kochuam te lemto ingka” ati thak kik tak zia hi, Bang guala ngai ding ahi diam? Zia hi thuthungthak Kochuam, Krista Kochuam chu ahi. Thuthunglui Kochuan tawh ki zawpna um maleh, danglamna liantak a um ahi. Thuthung chu Jesu thisan ah thuthung ahin, a hung danglam tak zia kin Jesu’n “Ka Kochuam” ati thei ahi. A Kochuam, ama thisan ah a lei ahin, A Postol 12 ah Kochuam te kha a bul chu ahiu. Thuthung chu le a thak a hung hitak zia kin Kochuam le, Krista Kochuam Krista taksa, Krista lalna gam ahi. Chanchinpha Bu li achun, “Kochuam” ti nivei bep alang hi (Mt. 16:18; 18:17).

Thuthungthak Kochuam leh Thuthunglui Kochuam chu Krista thisan ah tatvek ahina chung in a umdan leh a kalmang a danglam ah, ziaziakachun Thuthunglui mite chu :Kochuam” ti minvua ahi puau. “Israel khua-leh-tui” ti ahi zawsek hi. Thuthungthak mite chu amal-amala krista’n a atat leh a kodawte ahi. Grik pau a “Eklisia” atiu chu ei pau ah “Kochuam” ti hi tawh a umzia thumun ahi atiu.

Tichun, “Kochuam” ti hi Thuthungthak a pathian mite min ahi biktai, Thuthunglui pathian mite chung a chun a mang ngai puau a. Z iaziakachun, zia lekhabu ah I gennawp chu Thuthungthak Kochuam ahi diak pen ahi.

Krista’n abul a pan ah, a siamdaw guala ngai ding hina. Tichun, Jesu’n “Zia Suangpi chung ahin, ka Kochuam te lemto ingka” ati kha. Thuthungthak Kochuam hi ahin, abul leh atawp chu ama ahin, “Ka Kochuan” ati thei ahi.

Zia hi Krista taksa ahung chan san leh a thawk san, athi san chu ahi, ama thisan ah a lei, a Mou, a taksa, ama hibukimtu chu ahi.

### **KRISTA KOCHUAM PAKHAT AHI.**

Krista Kochuam, Krista taksa chu a puma ngaitua in pakhat ahi ding ahi. Pathian ngaidan ah chun, ama gingtu diktak te bep kha a Kochuam te ahiu, khawimun ah le, bang hun ale um maleh, pumkhat ahiu. Kochuam Pawl chuam chuam um maleh Krista chu khen in a umpua, ginna ah ama zawmtu te chu Krista chu Krista ah chun pumkhat ahiu. “Lalpa pakhat ginna munkhat, Baptisma munkhat” ti ahi ngal a.

Kochuam Pawl(dang dang) chuam chuam hung umte hi bang ti ngai ding ahi ta diam? Krista chu khen in a um pua’n, ziaziakachun a taksa, Kochuam chu khen in a um di ahi pua’n, pumkhat ahi ding ahi. Jesu ngei in –A thiampu lal pauchapna ah khan, “Pumkhat ahina ding un” ti kha a dawt thupi pen taka hi.

(1). Kochuam kitezak hi pathian dawilam hi puana, Mihing hatlo na ziak ahi, ti’n mi tamtak in a ngaituau.

Tichun, Kochuam Pawl (dang dang) chuam chuam hi Pathian dawidan leh tupdan le ahipua, mihing sual ziakin a hung pawt mai ahi. Etsakna’n : Mani masialnate, Hotu hi nawpnate, Eima dawidante, ziaka hung um ahi, Pathian dawidan chu ahi puai, ti mi tamtak ngaidan ahi. Maleh ngaidan dang a um thei tho hi.

### **(2). Pathian in a nialpuai.**

Jesu’n “Ka Kochuam lemto ingka” ti thu a gen ngei a, maleh “Chutichun” “Khatikhan” ti thu a gen puai.

Kochuam ding didan leh siam didan bik bangma a gen lou ziakin miten pha a tiu gual gual ua a siam uh chu a phal ahilo inle a nialpuai ti chu hiatding ahi. Lal Jesu’n “Pumkhat ahi thei na ding un” tia a pauchap kha le nguntak in ngaitua le hin, tisa lam muthei ah dan khata luang ding atina ahi pua, thagau lama Pa-leh-Chapa a ki pumkhat gualua, gingtute kipumkhat na ding ahi, a dawt kha. Jesu’n a Kochuam Dan tangpi bep a zawma, akip-akawi in bang ma a genpua, ziakachun Kochuam pawl dang dang pawt lo thei ahi puai. Roman Kochuam leh Orthodox Kochuam te hi umlo thei ahi puau a, Protestant Kochuam hi le umlou thei ahi puai.

Baptis pawl ahem, Presbyterian pawl? Luthera pawl ahem? Pha Anglican pawl, genthei ahi puai. Zia pawl te hin a Dan uh Pathian Lekhabu ah amu chiat uh ahi ngal a, Pathian lekhabu hin pawl chuam chuam um a phal tina hi mailo ahem?.

Leng gam liantak a chun Sepai pawl chuam chuam tamtak ahem, Vaihawmtu pawl tamtak a um maithei ah, ahidan uh kibang chiat khello maleh, Leng pakhat khua-leh-tui ahi chiat gual un, Zia Kochuam pawl chuam te hile, Krista Kochuam chiat hilo diu ahem. Bangthu hitaleh Kochuam chu kituak dialdial ah Krista gingu I hi ding ahi.

Apostol thugin ah khan – “Kochuam te, mi zosia a dinga um chu ka ging” ti ahi. Kochuam chu gamkhat a mai ahipua, namkhat a ding mai ahi pua, Khawvel huap tina ahi.

### **KOCHUAM THIANGTHO** (Kochuam chu a thiangtho ahi).

“Thiangtho” ti thu hi ngaisual a bailam hi. Thuthungthak ziaktu te hin, Thuthunglui lama umzia kha kengin a ziak uh ahi mai thei a, Ziakachun thuthunglui lam ah a umdan (a umzia) chu “Pathian lama hi chuam (Kawichuam) ahem?. “Pathian lama zechang” ahi sek – “Pha bukim” ahem, “ Sual neilo” tina lam vang ahi puai. Tichun thuthungthak “Kochuam thiangtho” tite “Mithiangtho” tite, Mi thiangtho hi dinga koute” tite haw hile, a umzia chu “Sual neilo” “Pha bukim” tina lam chu ahi puai.

“Pathian lama kawichuam” “Pathian a” “Pathian a dinga kawichuam” ahi ziakin “Thiangtho” ti ahi (Lev. 11:44 leh IPet. 1:16). Paul in “Krista Jesu ah mithiangtho Phillipi khua umte” “Mithiangtho hi dinga koute” tit e, “Mithiangthote taksapna” tite hi amang ahi.

### **KOCHUAM KHAWVEL HUAP.**

Thuthungthak ei hildan in Krista Kochuam chu Khawvel huap ahi. Gamkhat a ding mai ahipua, namkhat a di mai ahi diakpua’n, Khawvel nam tina a ding ahi zawi – Suan um sungsia ding zel ding ahi.

Tawp chin nei puantin, Gamgi nei diak puan tin, khawvel a mihing a um sungsia nam zatin Lengte din ding zing ina, zia ziaka chun Khawvel huap ahi.

Amavang chu “Khawvel huap” ti hin Khawvel a mihing um zosia kochuam hi ding tina chu ahipua, khawvel ah mihing zosia lak ah chitin-namtin, pautin, mitin te din tina ahi. “Namtin ah mite, pautin ah mite, chitin ah mite, meltina mite, Pathian a din la thisan in la lei a” ti hi Pathian lekhabu gen dan chu ahin, Khawvel huap chu ahi ngei ahi.

### **KOCHUAM HISIAT THEILO AHI.**

Krista Kochuam chu sukmanghai thei ahipuai. Suangpi chung lepto, mithi khaw kul kotkhak inle a zawlo ding ti ahi ngala. Kochuam chu ama melma, pawlam thilhitheinate chu a zo ngai pua, a hisezo ngai diak puai; Kochuam hisesek tu pen chu a sunga midiklo umte ahi zawi. Kochuam sunga mi diklo umte hin Kochuam a pui sual ua, a su chau sek ui – Maleh Krista thagau, hinna chun zia gu keute hi ahun sem(mut) halkik seka, Krista dingin hattak in a hung ding kik sek ahi. A kingakna chu “Kumtuang Suangpi” ahia, kuama suk lingual ahi puan, “Hukdamna banga ki um” ahin melma in ahi setheilo ahi. Pathian hing Kochuam ahin, alu, Krista chu a zawp zing ziakin suk mangthai thei gual ahi puai. Khawvel huap ahi ziakin, khawi laia ahem miten la hi genthei maleu, mun danga ahung pung zel sek ah, hisiat thei taktak ahi puai.

**KOCHUAM IN A PHUTTE.**

Krista Kochuam chu zia gual a pumkhat, thiangtho, khawvel huap hi ah I hiat zia un, mitin te a laka kitulut ding leh ana sem ding in a phut ahi. Krista gingtu diktak ahi phawt chun Kochuam nuai ah kun hi haksa sa puana. Kochuam pan zia mai hilou in, gin ziaka hukdam I hui ahi, tih I kihil ngei ua, maleh gin ziaka hukdam hi taktak tu chun pathian Kochuam nuai ah kun leh ana sep chu nuam asa sek ngal uh ahi. Krista chun Suangpi chung a Kochuam lepto ding hi a genna, alepto ding chu mihiam hi ngei intin, zia te chun bangtin em Kochuam nasep a da ding uh. Ephesa 4:13- ah a gen kha sim lehin “Chun ginna leh Pathian chapa hiatna lama I hung pitin ua, Krista bukimna tawh kibang ah I hung kipumkhat theina ding un leh Krista taksa siampha dingin khenkhat te, solchak dingin, khenkhat te zawlnei dingin, khenkhat te chanchinpha gen dingin, khenkhat Kochuam vak dingin leh Zilsaktu dinga te apia. Ama ziaka taksa pumlum chun a kizawpna zosia ziaka, lem taka suktua leh kizawm khawma, bak tin in a sep ding dan gual taka a sep phat leh taksa chu a khang a, hepina in ama leh ama a kilem to ahi” ati.

Zia tak ahin taksa bung tin chu ki supung ding ain a tawitang chiat uh ahi, ti a genna. Kochuam le zia gual chu ahi – Solchak ten hi ding a nei gualun upaten le a nei ua, gingtu zosia’n a nei uh ahi.

**KOCHUAM HI DING.**

(1). Kum 1937 khan Edinburgh khua ah Protestant Khristian Ai-aw tute, Kochuam um dan thu ngaitua dingin aki khawm ua, Kochuam hi ding pen ah agen uh chu :- (i). Pathian chawihawi, (ii). Anasep, (iii). Khawvel ah a thu puanzak ahi. – Mimal inle hi ding a nei a, maleh taksa pumlum dawilam leh phatna ahi zing ding ahi. Calvin chun, “Mi thiangthote chu Krista tawh a kizawp ua, Pathian malzawlina a dawn tapo uh chu amau ki sukhattua nau in a mang sek uh ahi” ti’n a gen.

Pathian chawihawi hi Kochuam um san ahin, Pathian chawihawina a taksap chun a chauna bul ahi sek ahi. Pathian a chawihawi a – a biak chun ama din Annpha pen ahi. A hanta di’u leh a khanletna bul ahung hisek ahi.

Pathian biak :- Pathian biak ahem, chawihawi ahem chu lamni in ahitheh ah, a pani in a pawimaw in a kul gelgel ahi.

a). A Lawma : Pathian biak, zia Kochuam in (Khristian ten I uar pen uh pakhat ahin, kul-le-akula, phat-le-apha ahi. Biak Inn a I kikhawm ua, pakna late I sau a, ama thute I sim ua, I pauchap ua, thu I ngaitak teu hile a lawma pathian bia I hui. Zia hi chanchinpha dan ahin, Kochuam te ding hilotheilo ahi.

i). Eima mimal pathian biak :- Zia hile Khristian te din mamaw taka hi. Biak –Inn a mite pauchapna ngaitaka, Amen pi mai chu ahun tawk puan, eima fianrel(mimal) ah leh eima Inkuan ah, Pathian biak, pathian pawl a kul ahi. Namtin ah mite, Chitina mite a thisan in a lei a, I Pathian uh a dinga khua leh tui ah leh thiampu ate ei siam tak zia kin mitin in eima gitlo thupha I chawi thei a, eima thilpiak I lan thei a, eima taksap I don thei ahi. Zia thuthungthak in pathian dan a Ziltipawmaw tak chu ahi.

ii). Anasep : “Pathian nasep” tih pathian dawigual hi leh a mawina ding thil hi, tina ahi. Kochuam chun pathian na a sem ding ahin, pathian min hi melphat leh suklopi a tup ding ahin gitlona zosia laka mite hukdamna dinga, Pathian thugen leh tasamte, mimawlte sukpi leh panpite hi Pathian nasep chu hina, Kochuam thilbawl ding pawimaw tak hina. Kochuam thil a bawl theina dingin, mitin

in septhei tak I nei chiata, I bawlthei nei sunte chu I bawl chun Pathian kipak ding ahin, Chutichun Kochuam in na sem thei ina. Pathian apat malzawlina I don , Bu-leh-Bal, sum-leh-pai I lawdaw teu, Pathian pechiat leu hin Kochuam in thilbawl thei ina. Zia chu pathian nasep na pawimaw taka hi.

#### **A THUPUANZAK.**

Zia hi henailo te kianga pathian thu puanzak na ahi. Missionary na ahi. Kochuam chu “Pathian Sungkuan” ahin, pathian Innsung mite a pau dawizawng hian ginglo mite kianga Solchak a sawl diu ahi. Lal Jesu ngei khanle 12 te kha a tel ah, a sawldawka, zia nunga chun le mi 70 a sawldawk kik ahi. Mithi laka pat a thawkik nung a khanle a zilsak te chu, “Gamtin ah chia ah, Chanchinpha gen dingin” thu apia ahi. Tichun zia taka “A Zilsakte” tihi Apostolte tina ahipua “Ama gingtute” tina ahi zawi. Ziaziakachun, Solchak te bep hilouin ama gingtapo te chun chanchinpha hi a gen sek diu ahi.

Lal Jesu gingtu taktak te chun masang a Peter, Johan guala khan “Thil ka muteu leh ka hiatteu kha genlo thei ka hi puau” ati pek uh ahi.

#### **KOCHUAM THUNEINA.**

Khrista Kochuam te chun Chanchinpha a ginna lam u ate leh Kochuam ah panphal leh phallo thu ah te thuneina anei uh ahi. A kochuam chia na lampi dingun thugin a siamthei a, a kochuam a lawplut ding leh dawi-leh-dawilo a nei thei a, zia a thuneina ah chun pawlam thuneina ah bang man a pawng naw thei puai. Ama bo chu, Roman Kochuam gual lawm in Kochuam thuneina I Uar lo nau a, a awmtawk in Protestant Kochuam inle Kochuam thuneina tawk chu a nei uh ahi. A Kochuam kivawp dan ah te, hotu siam dan ate, member siam dan ate, thunun dan a tea ma Kochuam thuneina tiang a nei chiat uh ahi.

Zia thuneina hi Lalpa vang ahia, A lalpa tawh kizawmkhat, taksa leh Lu ahiziak ua a Lalpa’u thu neina chu mang in Kochuam in thu a nei ahi.

Kochuam thuneina dan vakkhen deu lehin , Zia gual hi hina :-

i). Lal Jesu thuneina : Lal Jesu chu a damgual piteu leh, masang zilsak tute gual ahi puai ti ahe ngal ua. “Malai miten chu tin atiu.....kei vang chun ka ti lahiu” (Mat. 5:21-22), ti hi a paudan ahin, ama ah mite sangin thunei zawn a kigen hin ahi. A mite chu gam tina chia ah Chanchinpha gen ah, Pa-leh-Chapa thagau thiangtho min a baptis ding in thu a pia. A kiang ua chun “ Thagau thiangtho nei un, kua gitlo le la ngaidam uh chu ngaidam hintin, la ngaidam lou uh chu ngaidam lo hina” (Jhn, 20:22-23) “Lekha ziaktute bang lou taka, thunei taka a zilsak ziakin mipite chu mak a sau” (Mat. 7:29) ti l mui.

Zia hi ahi ziakin Lal Jesu zal in Kochuam ten le, Kochuam sunga chun thuneina a nei uh ahi. Ngaidam dinga pha asak uh chu a ngaidam thei ua, ngaidam lo dinga pha asak uh a ngaidam lo thei uh ahi. Ama Kochuam thunun dan chu a Kochuam sunga chun a mang thei ua, kuaman sawisel thei na ding thu a um puai.

#### **THAGAU THIANGTHO PUINA.**

Kochuam chu Thangau thiangtho, In thiangtho ahin, bang hun inle Pathian thagau in a pui hi lehin genkhial hi puana. Sawlchak te leh Thiangau te Suangphum chung a kinga, thagau a Pathian chenna dinga lepkhawm ahi ngala; ziaziakachun thutak ahe, thutak chun ahipil a, bang tik lai inle, Pathian

dawigual leh dawilo gual aheu a, thu anei uh ahi. Ziakachun Apostol ten le, “Thagau thiangtho leh kei un.....apha katiu” (Nas. 15:28) ati thei uh ahi. Lal Jesu khanle a zilsak te chu, “Thagau thiangtho in thu dik zosia ah hun puilut ina”, (Jhn. 16:13) ati. Ziakiachun, Thagau thiangtho zal in thagau thiangtho pui in Kochuam chun thuneina a nei ahi.

### **KOCHUAM THUNEINA CHU AMA A AHIPUAI.**

Kochuam chu pathian Kochuam ahin, a thunei na chule Pathian piak ahi. Kochuam chu ama ngawn ah um ahipua, Pathian tawh vaihawm ahia, Pathian thuneina ziaka thuneina nei ahi. “Ka thupiak te la bawl ua leh ka gualte hin lau” (Jhn. 15:14) Jesu’n ati. Lal Jesu chanchinpha gen dingin a sawl ah; Jesu’n a sawlna hi a zui ua chun a kiang ua umpi zing a tiam ahi. Pathian Kochuam chu thutak ban leh kingakna ahin (Itim. 3:15) thu dik ah um ahi zia un midikte chungu chun thu anei thei a, mipha tapo chu Kochuam nuai ah hin a kitulut sek uh ahi. Pawlam thuneina in a sunga thu anei ding ahi puai.

### **KOCHUAM THUNUNNA.**

“THUNUN” (Discipline) I ti hi Kochuam thu neina chia zel kha ahi mai a, a pawimaw dan leh a kuldan le a ngai ala hizing, Kochuam hi dan neilo in a um thei pua, thununna chu a dana mi chia sak a tupna ahi.

Kochuam in thunna amat chu a kul him ding ahi. Kochuam chun mumal leh chia dan a neilo chun pha ding ahi pawngal ah achia dan gual tak ah amite umsak tup nakha thunun na ahia. Ziakiachun kochuam chun a thununna chu amang lotheilou ahi.

#### **1). THUNUNA KULZIA.**

Kochuam thununa hi manglou in mitin amau thuthun um taleu chu phapuan na, kochuam in dawitiang leh dawilou tiang te aneilou chun khawvel taw kigam gitna tiang umthei puan tin ,kochuam athiantho lou zawmai ding ahi.

Ziakiachun kochuam chun banglai inle athununa chu mat akul ah amang zing ding ahi. kochuam sung ah mite chun bawllou ding abawl ahi chun ahil ding(azil ngai)ding ahin, athunun ding ahi.

Zia chu kochuam mimalte phatna chu kochuam pumpi phatna ding ahi. Thununna chu kochuam silthianna ahin, kochuam siamlem na ahi. Kochuam suk hatna ahi. Thil hikhial te gawt na ahipuan siamphat tup na ahi. “Ka chapa, lalpa thununna ngainep kin la, azil gai ah laum inle kithada kin” (Heb.12:6,7). Lalpa chun ahepi te chu athun nun seka, cha alawp tapou chu avawsek ahi.

#### **2). THUNEINA CHABI.**

Lalpa chu “David chabi nei a, kuama khak lo dinga hawnga, leh kuama hawn lo dinga khak” ahi (Thup. 3:7). Zia Chabi chu Kochuam te kiangin a pia, Ziakiachun, Kochuam te chun Kochuam kawt hawn theina leh khaktheina thueneina chu anei uh ahi. Mt. 16: 19 ah Peter kiana a gen gaul tak chu, Mt. 18:18 ah chun Zilsakte zosia te kiangin a gena, mithi laka pat a thawkik nung ah le thuneina chu apekik ahi (Jh. 20:23). Amabochu, zia thuneina hi mite nawpawp ah gawt theina chu ahi puan. Thagau thiangtho in a umpi zia kin a Kochuam ah pang tak ah a ngai chu hintin, tak lou a a ngai chu taklo hina, tina hina. Hukdamna lam thu ah thu anei thei, tina hilou in a Kochuama panphal theina leh phallo theina a nei ui tina ahi. Kochuam in mite Hukdam hilo dingin apai thei tina hi puantin, a Kochuam a panphal theina leh Phallo theina a neithe tina ahi bep ding ahi. Roman Catholic te chun,

zia thuneina chabi hi Pathian kianga piak ahi bika, Roman Kochuam chun mite vangam chia lo dinga khak theina ka nei uh ahi tia chu sek ua, maleh zia hi Protestang te chun a pawm thei pua, Kochuam thunna hi lei chung a Kochuam umfel(dik) theina ding leh phatna ding ahin, Hukdamna lam thu chu a tungpha talaw puai, ti'n a ngai uh ahi.

### **3). THUNUNNA MAT DAN.**

Mi kuale ahi khialna matdaw in um taleh, nang uh thagau mite haw, thepna tuak khangka tia, ziagual mi chu tung ding kik un(Gal. 6:1) Paul in atia. Jesu'n le (Mt. 18:15-22) "Van sagi mun sawm sagi tianga ngaidam dingin ei hil". Ziakiachun, thununna hile, a zaidam thei pen a, a dawthei lam pen a, lungsiatna lungthim ah mat hin a lang hi. Paul in ei hildan leh Jesu ei zilti dan inle khutting taka hiding hin a lang, Unau thilhihial chu Kochuam ah tutmai lo ah, siamphat tup phawt tak di chu a phalam hi dingin a gen ahi.

Zia gual ah chun Kochuam in dan a mi vawmai lo in hilna leh zilngaina nei tam zaw leh, hilotheilo ahi phat bep leh dan chu lek leh a phazaw ding ahi. Kochuam hi gitlo ngaidamna thu gentu ahi ngala, ngaidam nuam mi ahi le a pawimaw ahi. Amabo chu thil gilo bawltu sualna chu vantang hiat ahi chun Kochuam chu a tawilo ding ahi. Paul in IKor. 5:1-8 ah a gen guala khan Kochuam a soal langsa him-Kochuam chu zensuak ngal ina. Ziakachun, Kochuam chun thununna chu thiam takin, pilvang takin, amat ngei pawimaw ina. Thunun dan lampi a nei te chu –Zilgai, hil, kan, pawlam a kawite ahi. Zia hi amasa lam mang tam deu lehin, a nununglam hi mang hakseu thei lehin, chanchinpha tawh a kilawm tuak zaw ahi. Soal chu huat ding ahin, migilo vang chu lungsiat ding ahi. Chutichun, migilo chu haisan theina dan pen dinga I pui chun thil I bawl pha hi ding ahi.

#### **Thununna mawpawtu (Kochuam Hotute) :**

Kochuam pawl zosia hin hotu ahem, hotute ahem chu anei chaitua, zia hotute hin thunna chu a vawp sek ua. Kochuam khenkhat a chun hotu pakhat ahem, mitawmcha ahem khut a thunna hi a um sek a, khenkhat bo chu Kochuam Committee in thununna hi a vawp ua. Presbyterian Kochuam a chun Kochuam Upa pawl in thununna hi a kawl sek ui. Pastorte thunna bo chu Khawmpi in a kawl sek. Zia chu le amau mina, amau thilhitheina ah ahiu ahi puau, Lalpa min a Lalpa dawigual(dawilam) hi ah a ngaiteu a bawl sek uh ahi. Presbyterian Kochuam ah chun Kochuam vaihawm pawl ahem, Khawmpi vaihawm pawl ahem te kha Vantaang tel ahi ziakun Kochuam Ai a aw h zo sek ua, a thil hui kha Kochuam bawl ahi mai sek ahi. Zia Kochuam thunna vawptute hi a mawpuak nau a lian mama mai a, Pathian Kochuam, ama thisan ah a leite chu kai huaitu leh thununtu ahi ziakun Lalpa dawigual bang ahi em ti thiam a kul mama sek ahi. Thunna chu lungnatna pang lo in, lungthim zangtak pu ah mat ding ahin, eima pha tina lam bep hilo in, Lalpa dawilam hi-ah a hiatdan bangpen in a mang diu ahi.

#### **THIL HIKHIALTU :**

Thil hikhial tu chun, Kochuam thunna khawk a sak lou a, ama lup a alup chun amang thuk deudeu seka, aman thaitheng le a lau um thei ahi. Ama di'n suala pat tatdawkna phapen chu Kochuam mapuitute chu mihiam ve mai ma, hidik lo thei hi maleu, dan tangpi'n I lak ua, mifel leh pha hia ah I ginchak I tel te ahiu a, thildik leh lamdik le ahe sek pen uh ahi. Zia lou ah chun le Kochuam te chu Thagau thiangtho in a umpi sek a, thudik zosia ah a puilut sek a, Kochuam a puina lam ua chun a gammang bek ngaipuu. Ziakiachun, Kochuam a thilhihial tu chu Kochuam thununna nuai ah kun

thiam henla, simna lungthim nei in Kochuam puitute phasak zawng in umtup henla, ama di'n phat naleh man nei ahipen sek ahi.

#### **KOCHUAM MIPITE :-**

Kochuam mipi tenle mapuitute mapuina chu ngaikhawh uh henla, thil hikhialtu chule a haisan theina ding in la panpi leu a phai. Kochuam mipi'n ama kai tuteu khawksak dan athiamlou uhchun kochuam chu chia hawi thei puantin amau a ngei ding inlepawi inah. Kouchuam thunnun na khawksalou michu paul in (2 timothi 3:14) ah khan vawp le ki vawp pi lou ding in kou chuam te chu ahil ah, zia gial mi chu kochuam hi basam tu ahiu. Kouchuam mipi techun amapui tuteu vaihawm chu zawm thiam leu apha ahi.

#### **PAWL DANG TE:**

Khaw khat ahem gam khat ahem leh khristian pawl dangte hi aulou theilou seka, zia te chu tawh le kouchuam thunnun na dan te, khristian nun idawi thiantho dan te kibang thei deu leh apha pawl khat in dan zokim lou ah angaite pawl dangin ala lalut lou maileu, thunnun aum te khale kihiat thiam piak zawleu apha.

#### **KOCHUAM NASEPNA:**

Thuthungthak chun kochuam hi, "Khrista taksa" leh " pathian inn kuan " gual in agen ah, zia chu siamphat nan leh sukpitin na ding achun pathian in mite akou ah anasep na ding leh adin mun ding teu le aguat piak ti ei hil-jia nasep na ding chuam chuam a ding achun thagau thil piak chuam chuam aum ti ei hil(ei kaww mui ) (1 kor 12:4—6) Jia khrista taksa siam phat na achun paul chun din mun khenkhat agen ah (1 kor 12:28 ) ah chun, amasapen ah " sawlchakte ani na thuhil tute , apa thumna chun zilsak tute" Ephesi 4:13 ah chun " Sawlchakte ,zilsaktute, chanchinpha kouchuam vaktute leh zilsak tute" atia.

Zia hi Kochuam hotu na ahi chiat em? Ti dawnhuna ahin mite a buai sek ui.

Khenkhat in Thuthungthak in Kochuam hotu a gen chu Sawngthum ahi, Bishop, Presbyter leh Deacon; zia chu Hotu, Upa, Nasemtu ti ding ahi atiu. 'Hotu' ti leh 'Upa' ti hi thil thumun ahin, a chang leh 'Hotu' atiu a chang leh 'Upa' ati mai uh ahi. Paul in Ephesa khua upate a kou a, a kiang ua thu a gen khan, "Thagau thiangtho in a chung ua hotu dinga a siam la hui" atia. Ephesi upate chu 'Hotu' ati kik ta mai ahi. Jerusalem khawmpi masapen ah khan a kawmpiu houtu chu Solchak leh upate (Sol. 15:6) ahi ti I mui.

Thuthungthak a hin Kochuam hotu imu pen chu, zia chini(2) Solchak leh upate bep hi ahiu atiu.

Zia hi a diktuaq mai hi I thuthungthak in Kochuam hotu a genpen chu zia chini(2) hi ahin, Kochuam nasepna detpente chu ahi, ti'n I pawm ding ahi.

"Thiampute" tite leh "Thuhiltu" "Zilsaktute" "Kochuam vaktute" tit e kha chu hotu dang na hilo in, hotuna chuam a ngaizaww ding ahi. Tichun zia lekha bu ah I ngai khaww dipen zia nasep kawng ni(2) – Solchak leh upate na hi Thuthungthak in Kochuam nasepna ah a gen pen te chu ahi, ti thu ahi ding ahi.



**1. SOLCHAKTE :**

Zia hi LalJesu'n Solchak (Apostol) Sawmpni te a tel te kha a bul ahin, Thuthungthak hotu umsun leh dingdet masapen ahiau. Amau hi Lal Jesu'n Solchak dingin a kou a, a guat deta, Jesu chinchang bangkim hetu ahiau a, Jesu damlai inle thugen in a sawldawk, gamhuaite chungu thunei theina leh damlote sukdam theina apia (Mat. 10:2-42). Zia nunga chun le, Solchak 70 te a sawldawk kik a, thuneina apekik-(Luk. 1:-1-16) solchakte chu krista thuneina dawngtute, thu nasemtute chu ahiau.

Jesun a nutsia nungin, Penticost ni nung leh amakhan hotu chan a changua, gingtute lakin mapuitu ahiau a, thuneitak in a um zel ui. Gingtu ahung pun zel lai un leh nungin le hotu ahi zel ua, thu nasein in khawtin ah a chia zel ua, bial nei gual deu in a khawsau ahi. Kochuam a bik chu a umto zel ua, Paul te, Barnaba te, Jakob te a hung pan nung ua chun thu nasemtu solchak lam na a sem ui. Apostol ti ahi vesek, khawkhath hotu a kawiteu kha chu 'Upa' ti ahin, thugen mi, bial nei ahem, khualzin mi ahem kha 'Solchak' ti ahi.

Paul leh Barnaba chu 'Solchak' ti ahi sek ahi (Sol. 14:14). Andronika leh Junia te 'Solchak' ti ahi (Rom 16:7), Lalpa unau jakob le 'Solchak' ti ahi (Gal. 1:19), Epaphrodita le ahi tuak hi (Phil. 2:25). Sila leh Timothe le (IThes. 1:1), (IKor. 15:5-7) ah Solchak 12 te leh Solchak zosia ati chu a khenchuam ahi. IKor. 11:13 hi I sim in Solchak atam dan uh alang hi. Apostol 12 te nasep atiu bu Disache atiu a chun chute lamthu a ki lang (tam) chian hi a tiu, alemte le atam atiu. Tichun, zia solchak lam chite chun bial nei ahem, neilo ahem inle Kochuam taw ah zin hi a nasep uh ahi sek a, khawtin a Kochuam tikham deu ah a um nau a chun upa a siampiak zel uh ahi (Sol. 14:23; Tit. 1:5).

Zia te hi Kochuam munkhat hotu ahiau a, 'Presbyter' Presbytery upa ati sek ui (Sol. 20:28; Phil. 1:1; ITim. 3:1 ah chun zia te hi 'Hotu' Bishop, atiu ahi. Tichun Bishop, ti leh Presbyter ti chu mi pakhat min chuam bep ahin, anasep dang min ahipuai. Tichun zia khawkhath hotu gual ahi, ahung pung deu deu ua, khawtin a um bep hilo in pani pathun te le aum tau ahi. Sawlchak khualzin mi te kha chu atawm deu deu thung ahi. Tichun Apostol te leh ama sawltu te thizaw nung ua chun Bishop ati gual chi teu kha khawtin ah ahung umtau a, khawpi siam in vai ahawm zawu ahi. Chun,, zia Bishop te leh alim ah sawlchak zinmite le IKor. 9:1-14 a Paul pandan ah khan Kochuam in a chawm uh ahi ti a taklang, 'Lalpa chun chanchinpha gentute chu chanchinpha chu a nek mu na dingua guat ahi' ati. Paul chun Kochuam a ne lo in a sem a, a suang ahi. Chutichun upa ahem, Bishop ahem kha Kochuam awptu, Kochuam chawmtu ahi zia un belampu, Pastor, ti hi a law zing tau ahi. Zia hi Kochuam na, Kochuam etkawl na ahin, thuthungthak gendan zia te hi Pathian in Kochuam te kianga a piak ahi (Eph. 4:11-13) Kochuam te chu Krista taksa, bangkim a, bangkim sungdimtu bukim na ahi zia kin Kochuam siamphat na chu Pathian dawigual ahin, Pathian in a na semdingte chu a kou sek hin gen ahi. Tichun Kochuam nasepna hi mihiamte lemguat leh siamkawm mai ahi pua, Pathian lemguat Pathian dawilam ahin, pathian kouna chang mite bep sep chi ahi.

A lim ah chun Bishop ti leh Upa ti kha matpawl ahin, na dang ahi puai. Peter inle upa a kiti (IPet. 5:1) Johan inle a kiti (IIJohan 1ah) Kochuam hotu ahiau a, Kochuam upa ahiau mai bak un, Kochuam a killawina thu ahil ua, Sacrament te le a bawlua, Kochuam ahung khang zel a, puitu ahung ngai ua, mithak te alau a, namdetna te anei ua, zia chu nasemtu namdet (Ordained) hung pawtna bul ahung hita ahi. 200A.D leh 300 A.D kikal ahin chu Bishop la bik a umpua, Kochuam tin a Bishop te kha kibang chiat a ngai ahi. Bishop lui chun a thak chu a namdet sek ua, namdettu chun, a namdetna chung ah chun thunei nawpna ahung um a; Solkar in Khristian sakhua ahung pawm tak nung 320 A.D nunglam a chun Solkar hotu te

tawh kikawp vai deu te leh mun pawimaw deu a chute khan mi dang chung a thunei nawpna a umta zel ahi.

Chuti dan ah chun Rom khua Bishop pawimaw pen a ngai ahung hita, 480 A.D vel ah hin Rom khaw Bishop Marcelions chu “Pope Marcelions” tin a ziaka, zia chu pope ti min alat masakna pen ahi. Hiti lai ahin, Hotu kizawp hi miten a ngaitua tau a, Rom Kochuam vang chun Hotu sawng tamtak a siam dawk tau ahi. Maleh, Chanchinpha Kochuam (Evangelical Church) taktak chun thuthungthak in Hotu a gen bep lo hi chu Hotu sawngdang a nei puau. Zia chu Solchak te leh Upate ti kha ahin, ‘Solchak’ ti hin Pastor te Bishop te, Kochuam namdet, Kochuam chawmna nete kha a huap. “Upa” ti hin law neilo ah Kochuam nasemtu te kha a huam ahi. Zia chu ‘Vaihawm uap’ ti ahiu. Pastor te tawh Kochuam etkawlNa Na a semkhawm sek uh ahi. Zia hi Thuthungthak zilsakna dan pena alat ziakin zia gual dan tak hi Kochuam kalmang chi ahi ding ahi, tia ngai ahin. Ziakiachun, tu Pastor ahem Ordained minister, ati thu hi ngaitua ding I hui.

#### **ORDAINED MINISTER SIAMDAN.**

Zia hi Pastor iti gual uh ahia, thu nasem ding leh Sacrament te hi ding a Ordained ahi sek. Pastor namdet na hi thil thupi tak, pawimaw tak ahin, Lal Jesu Kochuam te lupen min a bawl ahi sek hi. Kham dinna maimai guala ngai ding ahi puau, ngaithei le ahidiak puai. Hotu dang guala Kochuam a tel mai ding le ahi puan, Pathian Ko mi-ama ngei le kipemi ahiding ahi. Pathian kona tak nuamlo tak hin tin, lim le lim puantin, kipak diak puana – Chuti chun Pastor hi ding a thil pawimaw pente kawngbi gen leu hin.

(i). Pathian kona : Pastor Kochuam chawntu(Vaktu) hi ding chu Pathian ko mi hi ngei ding ahi. Pathian kona bang ma helou a zia na ahi alut chun Kochuam te kianga Pathian thilsiam hilo ding ahi. Khrista taksa siampha dinga pathian thilpiak masapen chu Eph. 4:13 ah khan “Solchak” ti ahi. Solchak te chu Pathian kona hemi ahi ngei a kul ahi. Paul in “Timakmawh ka chung a kinga ahi” (IKor. 9:16) ati gual khan Pastor diktak te chu zia na ahin aki pelo theilo ahin, krista hepi na chun a sawl lui sek ahi. Kilakna maktak ahem, thupiak ahem a um ah, a kipiak ziak a phatchuam na ding ahem a lawding tamlam ahem, a dinmun lopi dan ding ngaitua lo in, zia nasepna ahin a lut sek ua, a dinmun uh leh a chanvo uh bang a ding ale Lalpa khut a ngak sek uh ahi. “Nasemtu chu Law mutak ahi” ti Lalpa thu chu gingmai in akipe sek ua, Lalpa chun a taksap sak ngaipua, Lalpa chu a tasam ngailo bawk ahi. Zia gual mi chu Kochuam chawmtu(Vaktu) hi dinga Lalpa komi ahi sek hi.

(ii). Pastor na zilna : Zia guala pathian komi hi-ah Kochuam in a hiat chun a damsung a na sem dingin a zilsak sek ua, zilna skul ah a zilsak sek in, a sawl sek ahi. Kochuam in a en chianna, khawmpi in a etchian nunginm, Pathian komi hi dinga a hiat chun zilzel tak hi-ah a ginchak uh chun Kochuam chawmtu (Vaktu) hitak dingin a zilsak sek ua, a damsung na ding kha kum bangzat hen sung dinga (siam) piak sek uh ahi. Lal Jesu ngei khan le a nasep na kha manmaw takin ahi mai ngai puau, sawttak a kisiam khawl nung in, ama le kum30 atin kum pat khan a sem pan ahin, Paul inle kona chiantak a mu nung ah, Arabian gam ah kumthum a chia mang phawt a, daithip ah a ki saw khawl ahi.

Zia guala chun, Pathian komi ngei te le ki sakhawl a kul a, ama ngei leh a ki sakhawl ding ahi. Kisakhawl lo ah min Na a sep chun Dathun(Da) leh Chau hun nei intin, Nasemtu phachuam lotak hi mai ina. Kochuam chawmtu(vaktu) te chun skul zil bep le hilou in, a chawmte kianga, Ann tuitak a piak theina ding in, a damsung chu a ki sakhawl zing ding ahi.

(iii). Namdetna (Ordain) :-

Pathian komi damsung Na dinga zilsakna chang ta chun Kochuam kona a mu kiktak bawk chun, namdet ahung hisek ta. Kochuam in zia gual puitu leh nasemtu hiding a namdet tak teu chu thuneina lopitak a nei ta ahi. pathian in ana sem ding a kona kha a Kochuam in a suk pitin piak ahi ta, thuneina lopitak leh mawpuakna liantak chu apetau ahi.

Zia hi thuthungthak dan ahi him a, paul ngei inle Galatia 1:1 ah khan a Solchak hina chu mihing a pat hilo in, Pathian a pat ahi tin a pang nasa ahi. Antiokei Kochuam te kha alu chungu khut ngat in, pauchap in a namdet ah, a sawldawk ti I mu (Sol. 13:2-3). Zia gual namdetna hi chanchinpha gen di leh thil chan buatsaitu hi dinga kikawi chuamna ahin, Apostol te damlai ah a chinsek dan uh ahi ti I hia. Pathian Kochuam ted an ahi. Ziakiachun, Krista Kochuam te chun tu tiang in zia dan hi nasemtu hi dingin puithu taka kikawichuam hi apha, akul him ahi. Namdet nasemtu chu mi “Kochuam” ahi.

#### **PATHIAN THU LEH SACRAMENT NASEMTU :-**

Paul in Ephesi Upate kianga khan “Pathian kochuam te, ama thisan a leite chu vak dingin nang uh leh la lawite chungun chingthei un” (Solch. 20:28) ah atia. Lal Jesu’n Peter kianga “Ka belum te vak in” (Jh. 21:17) ati kha a hezing ahi thei. Pastor chu Pathian Belum gualte chawmtu ah guat ahin, jesu’n ‘Mihing hi Vaithum bep in hing puana, pathian apat thutin pawt lo chun’ (Mt. 4:4) ati khan le Pathian thu ah chawmna (vakna) ati hun alang. Ama Lal Jesu ngei kha le ‘Pathian thu’ ahia, ‘Hinna vaithum’ ahi kik a. Zia ziakachun, Pastor chu, ‘Pathian thu leh Sacrament nasemtu’ ti ahi.

#### **(a). PASTOR CHU THU HILTU AHIDAN.**

Pathian lekhabu hi Lal Jesu chanchin ei hiatsaktu leh ama ngei he dinga pathian in ei panpina ahin, lal Jesu chu I hukdam pa’u ahidan ei hiatsak na dinga a thu matsek chu ahi. Gingtu tin in pathian Lekhabu hi sim in Jesu aw kam ngei in, a ngaitha’u in ahe thei ua, thuhiltu lo inle, a Hukdam pau dingin pawm thei inau.

Amabochu, Pathian lekhabu hi Bukhat mai ahipua, bu tamtak kigawm khawm ahin, Peter in ati gual in thu hiat haksa taktak a um thei a, mi tamtak te chun Ethiopia mi gual ah khan “Min ei hilchian lo chun bang ti’n em ka hiat thei ding” ti thei tho inau. Ziakachun, pathian in a thu hilchian dingin mi ala ko ah, Pastor te nasep na hi ala buatsai ahi sek ahi. Pathian thu awi taktak te chun ama thu’n Pathian thu hi hiatthiam tawk chu anei thei ngei a, gingtu tamtak le Pastor te kaihuaina lo a, ama thu chia thei a um, maleh Kochuam ahin chapang tamtak a um zinga, thu hethiamlo le tamtak a um zingzel. Ziakiachun, amau haw kaitei di leh a thu a chawm (vak) dingin Pastor te a guat ahi. Tichun, thuhil hi Na lopitak ahi zia kin, hil dinga Pathian ko, Pastor te chu “Reverend” (Rev.) “Za Um” ti min aput sak sek uh ahi.

Paul chun, thugen ngawluhai a, gingtute hukdam chu pathian in pha ati (IKor. 1:21) ati “Thugen um loin bang ti’n em a hiat thei ding uh” (Rom. 10:14). Bawl makmaw ka chungu akinga tan gala, chanchinpha gen lo leng ka chung gik ding ahi. Thugen hi Kochuam chawmna (Vakna) ahin, Pastor te chu thu Nasem dinga pathian ko ahi. Kum 1560 vellai chun Scotland Kochuam chun SuperIntendent a siam ua, “Hapta khata thumvei bek thu a gensek ding ahi” a tiu a. Pastor chu thugentu ahi ngei ding ahi. Pastor chu thugen thei lo ah I kawi ahem, aman thugen sanga thildang a ngaisak zawk ahem chun a diklo ding ahi. Amavang chu Pastor chun Pathian a pawlzing ding ahin, Pathian apat thucha, amite kianga tut ding a nei ngei ngei ding ahin, a nei lo chun sangawn ahi mai hi. Pulpit chu mite gaina’n amang ding ahi pua’n, ama ngaidan mai mai a gen ding ahi puai. Chanchinpha thutak, Pathian lekhabu apat a dawn te ngei a puang ding ahi. Pastor chun a Pathian lekhabu chu a ki tuakpi a kivawp thei

diu ahin, a hiat thiamlo te a um chun hilchet bu a dawng ding ahi. A mite chanchin le a he ding ahin, a Ann dulam uh leh du lo lam uh ahe diu ahi. Thu Nasemtu ahiu a-Pathian Belam gualte chawmtu ahi. “Hampa hing depdup mun ah te a pui sek ding ahi. Ziltina thigua tin cheng laka leh lam leh lama teu mang naupang ahilo na dingun, chanchinpha thutak a chun aphudet ding ahi. Zia hi pastor na ahin, Thugentu Na ahi.

#### **PASTOR LEH SACRAMENT.**

Pastor chu thugentu ahi gual ma in, Sacrament hitu le ahin, pathian thu leh Sacrament nasemtu ahi. John Calvin chun Pathian ni sin leh Lalpa Zan-Ann, Sacrament nei a nuam, Baptisma le Kochuam kikhawpna ngei a hi ding ahi, ati sek. Maleh kawng danga chun Roman ten Mass amat diklo bekset ziak un, Protestant te chu Lalpa zan Ann Sacrament bawlina ah chun (Thugen tei ding) ahi. Thugenna a um tei ding ahi ati lawu ahi. Lalpa Zan-Ann Sacrament hilchet genna lampang Pathian lekhanbu thu kha sim ngei ngei ding ahi. Amabochu, Sacrament vaithum leh Uain chang dingin Thiampu samsak I ngai diak pua’n, gingtu tin hi eima pauchapna lan dingin thiampu I hi chiat tau a, Acarament thil I chan ding uh chu I sam thei chiat tau ahi. A hawmtu ding bo chu vantang in a kawichuam mi, namdet(Ordained) Pastor ahi ngei ding ahi tia ngai ahi. Zia ziakachun, Pastor te chu thu nasem ding leh Sacrament hawmtu dinga namdet ahi sek uh ahi. Sacrament hi thil ser(chan) ahin, mi mai mai in a hawm chun ser ahina kha bei mai thei ding ahin, ziaziaachun mi kawichuam namdet(Ordained) mi bep in ahi diu ahi tia ngai ahi.

#### **3 PASTOR LEH PATHIAN BIAK KIKHAWP.**

Khristian Kochuam thilbawl pawimaw ten chu pathian biak kikhawp hi ahi. Zia gual kikhawp na hi Biak-Inn ahem, Khawlai ahem le hileh, Pathian biak khawmna ahin, Khristian te din apha chuam ahi. Eima daithip ah Pathian biak ahem, Innkuan ah Pathian biak ahem le a phachuam thon a-ahuntawk pua, a a honpi ah Pathian la sakkhawm dumtum mai te hin I hin a su nuam a, I ginna’u le ahi det thei ahi.

Zia Pathian biaka hin Pastor chu zia gual kikhawpna ah chun a ki siamtup ding ahin, a biak ina kikhawm sekte chu a melhiat ham ham ding ahi. Zia gual kikhawpna chu feltak, nuamtak ahi thei na dingin lasak puitute, Lapawl puitute, Pulpit changtute feltak in a gel diu ahi. Pastor a taimat chun Biak-Inn kikhawm te le a enkawl vek ding ahin, Upa vaihawm pawl thugel chu a pawdawk zo ding ahi. Kikhawpna puitu tak, luntak ahitheina di leh ki khawpna ah navek a um lo dingin Pastor ngei chu a ki huktup ding ahin, kikhawpna leh Up takin a vawp ding ahi.

#### **4. PASTOR LEH NGAIDAMNA.**

“Mi gilote hukdam dingin Krista chu khawvel ah hung ahi” ti hi thugen gin um tak ahin, Pathian lekha bu in atia, pastor chu pathian ah a ginum phawt chun migilote dawthei mi, ngaidam thei mi ahi ding ahin, Paul in a gen gual in Krista thasanga mi gilo te kianga chun ‘Pathian tawh la kilem un’ (IIKor. 5:20) ti paukam hi a mang tam tawk ding ahi. Thiamgau Ezekiel chingtu, gen gual khan, simna a um phawt chun ngaidamna a um ti kawkm tu ahiding ahi. Vaihawmtu te gual in dan in mi avaw di ahi puan, dawthei takin-lungsiatna in mi a them ding ahi. A kiang ah miten a gitlo nate ahem, along ngai nateu ahem, a ginlel nateu apuan uh chun Kochuam vaihawmna ah tut mai lo in a ki siamphat thei na dan ding uh a guk ah kawkm dan a thiam ding ahi. Pastor chu thuguk nei mitak ahi ding ahin, mite gitlona mualpho maimai mi ahil ding ahi. Lal Jesu chu ‘Mi gilo gulpha’ sak ahi. Paul a leh mitamzaw sem alaklut thei na’n mi zosia suak a a kisiam a(Ikor. 9:19) Pastor chu mi lau um ahi di ahi puan, mi nelum, mi ngai um ahi zaw ding ahi.

### **5. PASTOR CHU ZILSAKPA AHI.**

Paul in Krista taksa siampha dinga nasepna dangdang a genna (Eph. 4:13) ah khan 'Kochuam chawmtu leh Ziltiltu' a kawu kawp ah. Lal Jesu kha le, "Zilsakpa" ti ahi sek. Paul in timothy kianga Kochuam hotu um dan ding a gen chianna ah khanle, "Zilsak thiam" ti a gen kha tho (Itim. 3:3). Zilsakna hi Kochuam chawmna kawng poimaw tak ahin, ziaka chun Pastor chu "Zilsakthiam" mi hi chu a pawimaw ahi. Zilsaktu diklo Kochuam ahin a um zing kha sek a, zia chun Kochuam a puikhial sek a, ziazakachun Pastor chu zia gual lak a Kochuam veng him tu ding ahi zia kin zilsak thiam mi ahi chu a pawimaw ahi.

Lal Jesu khan le mimal, Samari numei leh Nikodem te kianga khan zilsakna thu khuntak in a gen ah, Paul inle thugen zilsak hi a ching bawka, Pastor le a mite supil ding in zilsak thiam mi ahi a kul ahi. Pathian thu kalmang hi a zilsak thiam ding ahin, supil dinga hi vaklam genthei leh a pha ahi. Bile Class te, Sunday School te Chapang kikhawp mang pha leh Pastor pha hina.

### **6. PASTOR CHU BELAMPU AHI.**

'Pastor' thi belampu tina ahi him ah, Gangual vak tu in Belam gual a vak ah, a kaihuai a, a venhim, khaihkhin in. Pathian Kochuam te thagau lam ah Ann ah vaktu leh kaihuaitu leh vengtu guala ngai ahi zia kun, Pastor ti min hi vua ahi. Ana sep dan chu a kibang him ah, Belam pup ha chun a Belam te chu amin un a ko chiat ah, a puidawk sek ah. Amau a puia, Anntam na lam ah, dawn ding tamna lam ah te a puiseka lampet te leh kham ah te, a kiaklut lo na ding in a veng, gamsa lau um lak ate, thiguapi laka ahim thei na ding un ma asawn sak a, a ung, a baite leh a no hatlote chu a liangko in a pu sek ahi.

Pastor chun zia gual taka chun pathian kochuam te chu a kilkawi ding ahi. Thagau a gilkiat te chu Bible thu takin vak intin, hatlo te chu panpi intin, lam mangte chu a puikik ding ahin, damlote chu tawh intin, thafang te chu a thumuan sek ding ahi. Pastor phatak chu a mite tawh a kihothei ua, a kithala sek ua, Pastor leh a mite a ki hothei lo uh chun a kichawm thei(vakthei) nagi puau.

### **7. PASTOR CHU CHANCHINPHA PUANGTU AHI.**

Kochuam chu khawvel ah ama a ding aim ahi pua, ginglote kiang chanchinpha gen ding aim ahi. Kochuam te kiang vela chun ginglo mi chanchinpha helo mi, tamtak a um zing sek ua, zia te kianga chun chanchinpha chu gen lo theilo ahi zia kin. Tichun Pastor chun a Kochuam te chu Belam hawn vak ngaitak gual in a nei zing ding ahi, a vak pitin sate chu chanchinpha gen dinga sepia gual liantak mapuitu guala a ki ngai hun a um ding ahi. Kochuam chu a pitin taktak chun ama a ki ngaitua ta pua, midang hukdamna a ngaitua ta zawsek uh ahi.

Zia guala chun pastor chu mapuitu ahin, chanchinpha genzakna ah chun chanvo lopitak a nei sek ahi. Pastor chu Pastor phatak ahi chun a Kochuam chu Kochuam hingtak hintin, chanchinpha thezak chu a dawilam takle hina. Kochuam chanchinpha puan lungthim pulo chu Laodikei Kochuam gual a khan 'thizing ngala hing minpu' ahin, a ding khawsuak ngaipuau. Zia zia kachun, Kochuam chu chanchinpha puang Kochuam ahi thei na'n Pastor kha a suhingtu ahi ding ahi.

### **VAIHAWM UPATE.**

Zia hi thuthungthak nasep na a gen, kawng nina chu ahi. Abul chu solchak 6:1-6 ah mipha pasagi a telteu kha hi'n alang a, di leh a taksa lam uh mamaw teu ngaitua piak ding ahiu. 'kochuam na semtu' (Deacon) vua ahi (Itim. 3:8) kristian masate chu a nisin thil hawm thu'u a, Grik Judate a vui zia kua solchakte nek-leh-dawn lamthu ngaitua lou a thu Nasem a apan zel theina dingua, nek-leh-dawn lamthu ngaitua tu dinga zia mite hi a tel uh ahi. Khristian

masate chu Juda mi vek hi ziakun, zia hi thilthak talua ahilo maithei hi. Judate kikhawp na in (Sunagogue) ah chun upa sawmkhat a umsek ua, Sunagougue vaihawmtu tea hi sek ui. Zia thiampu lam na ahipua'n, vaihawm lam na hi zawi.

Zia guala Khristian masate lak ah chun solchak te chun thu nasep lam a chang ui, thiampu na lam kha abang deu zawn, upate bo chun taksa lam nasepna leh vaihawm na hi a chang deu solchak te leh up ate chu vaihawm in a ki chu khawm sek uh ahi. Upa vaihawm thiamte chu ngailut ding ahi ti le I hiau (Itim. 5:17). A lim ah patin solchak te leh vaihawm upate hi chu Kochuam ahia a um zing ahi ti ahia thei. Zia ziakachun, Upa na leh solchak thu Na sepna hi chu chanchinpha in a pianpi him ahi ti a gen ngam ahi. Solchak lam Na chu I mu ta, tu hin upa lam na en kik hitiu.

#### **UPA NA UMZIA.**

Zia Upa Na hi solch. 6:5-6 ah mipha pasagi te a tel uh kha a bul hi in alanga, alim taka chun solchak ten thu Na a sepzel theina ding ua taksa lam Na zangkhaina ding hi in alang. Maleh ami tel teu kha pilna leh thagau thiangtho ah dim mi ahizak un thugenna a sem nasau ahi solchakte gjualin a tawiui ti I hiau.

Stephen kha martal masapen ahin, Phillipa le Samaria gam ah thugentu masapen ahin, mite le a Baptis ti I hiai (Solch. 8:38). Azaw deu ah chun, zia Phillipa hi Kaisari khawlam ah a pem ah, chanu pali a nei a, thu agen sek ti I hiai. Jerusalem apat a kithezak nung ua khan Anhawmna mai hilou in thugen Na a sem ta zawu hi in alang. Zia mi pasagite hi Solchakte khan a namdet uh le I hiau (Solch. 6:6). Tichun a lim ah a telna santak sang ua na lopi zaw a sem tau ahi. Philipa vangvang chu Kaisar khut ah Hotu tak hin alang. Paul a te a zin ua khan le a khawsak mama hin a lang (Solch. 21:8). Zia nungsang hi chu a chanchin uh I he ta mawng puai, Paul ah te zinna a, "Upa a siampiak zel ui" I ti kha zia lam chi ahem, Bishop lam chi kha? Ti hi kinialna ahi sek. Bang chu hite leh khawmpi masapen ah vaihawm a chute kha chu 'Solchak leh Upate' ahia ti (Solch. 15:6-22) I mui. Hun ahungsawt deu deu a, Paul in Philipi 1:1 ah leh Itim.3:1,8 ah khan Bishop leh Kochuam nasemtu chu ala kawi chuam ta ahi. Didache bu 15:1 ah chun Bishop leh Kochuam nasemtu chu kawi chuam ahi(a chuam ah kawi).

Eusebia chun a damlai in 64 A.D vel chun Kochuam upa pasagi zel a um ti a gen hi. Zia mitel masapen pasagi number hi a ching uh hi leh a kilawm ahi. Masang upa Tertulian leh Augustin chu zia upate hi chu namdet lo ahi ti a gen. A phat uh leh a fel zia ua Kochuam vantang in a tel mai uh ahin, ordained lo (Lay man Ministry) nasepna ahi, atiu ahi. zia hi tulai matdan ahi ta deu pen ah, Pastor te gual lam ah, ama kipiakna umlo, mipha ahi ziaqua tel ahia a, a namdet dan uh le a kibang lo deu ahi. A fel dan ua hinle ngaidan dang a um, khenkhat chun damsung a dinga tel ahia hi, a tiu a, khenkhat in, kum bi tuk chin nei a tel ding ahi a tiu.

Tichun, tulai inle khenkhat chun damsung a dingin a telna, khenkhat te chun tel phat kik thei dingin kum bang ahem te sunga ding bep in a tel uh ahi.

Bang dan chu mang zaw ta leh hinle, zia nasep na ah I tepte pen ding chu zia hi ahi.

#### **(a). Thagau Nasep :-**

Zia Na hi taksa lam Na ahi pua, thagau nasep Na ahi. Mihiam tel himaleh, mipite lungthim apata pathian kou na ah I ngai sek ahi. A thil hi chu thugil lam he khel lo in, thawlom sum ngaitua ahem, biak in lam leh genthei ngaitua lam hi ziang leh le, Kochuam nasepna ahin, thagau lam na ahi. Vaihawm tu guala a thunei na chu mipi kianga pat a mu hilo in, khrista pat ahi. Tichun, vantang a dinga pha a ngaitua na chung in vantang dawidan ah a um mai ding ahi puai. Khrista dawigual tapo ah chun a um zaw ding ahi. Mipiten a puitu ding ua leh a

chung ua vaihawmtu hi dinga Pathian dawngkawm a(zeta) a tel uh ahi ziakin, Pastor te tawh Kochuam puitu leh mipite a dinga dan siam thei tu ahi ding uh ahi.

**(b). Pathian piak ahi:-**

Zia nasep Na hi khrista taksa siamphat na dinga Pathian guat ahin, Pthian in zia nasepna hi sem dingin mite a kosek ahi. Vantang in a tel ziak ua sem ta mai ahi puau a, Pathian in ami kou te chu vantang lungthim ah hiatsaka, a tel zawu ahi. Juda Iskariot thasang ding a tel ding uh khan mi pani(candidates) a guat ua, a vote uh chu Mathia chung a chu tai ti (Solch. 1:23-26) I mu’u a. Zia tak ah khan le “Zia mi panite hi a khawizaw ahem la tel?” ti’n a pauchap ua, Pathian tel chu a tel uh ahi. Tichun kitel hi Thuthungthak dan ahi him ah, Pathian in Kochuam na sem danga mitel chu I tel sek ua imitel chu Pathian in Kochuam te kianga a piak ahi, I tiu ahi. Tichun taksa lam Na guala kilalsakna na ahi pua’n, pathian in a Kochuam nasem dinga a koute ahin, nel umtak in Kochuam te chu a ki kawi ding ahi.

**1. Upate na bik.**

(a). Up ate hi ding pen chu Kochuam a mi hung lut te kha thutaka phudet leh khristian nun diktak ah nung dinga kaihuai hi ahin, zia hi Pathian nasepna, Kochuam te kianga a piak chu ahi. “Khristian nun diktak” ti chu Biak-Inn kaidan te leh thawlawm piak te leh nunphung himhim atele ahi.

(b). Kum zabi 17 na a ziaktu pakhat chun upa na a gen chu “mimawl te zilti ding, kikawithada te zilding, Da um thuakte thamuan ding, kilikte kaitho ding, damlote kantha ding, kituak lote genlem ding” atia. Pastor na lam tamtak kha a kikawp pi ding hin a genna, a dik him ahi, a lim ah Stephen te, Phillipate kha le zia gual chu ahi him ahi. Biak-Inn ah bep hilo in, a miteu chu a Inn lam ua leh khawlai ate le a khristian nun uh a hiatthiam pi ding uh ahi. Upa chun a Kochuam te a Inn uh taw in pastor el hilou a, Pastor ai-awh le ahipua a na him ahin, Kochuam hotu gual in a miteu ataw chu a dik gelgel ahiu. Pastor bial chu a lian deu a, Upa bial chu a neu deu mai ahia, Kochuam a tawvel dan ding uh chu a ki bang ahi.

(c). Upa Na min diktak chu “Vaihawmpa” ti kha ahia, upate chu Pastor te tawh Kochuam phatna ding leh chanchinpha zakna dingin a mawpuaknau chu a kibang ahi. Kochuam vaihawmna ah chun a vote uh a kikim a, alem he pen tapo kha mat mai ding ahin, thuneina lamna lam unle Pastor tawh vaihawmna mun ah chun a kibang him ahi. Kochuam mi lawlut ding lawplut lo ding te, baptisma chang tak leh taklo ti lam ah te, mikan ahem, nawdaw ahem ding thu ate a thunei nau chu a kikim chiat ahi.

(d). Pastor leh Upa chu Sacrament nasep thu ah le a kikawp zel thei ua. Sacrament hawmtu taktak bo chu Pastor ahi. Up ate chu a panpitu ahiu. Pastor chu upa chansak masan tin, Up ate chun mipite kianga hawm inau. Zia thu ahin, Sacrament nasemtu ahi ngal ua, Pastor chu a hawmtu ahi sek. Zia hi Upa na dang ahin, thilsel buatsaitu ahi na pen uh chu ahi. Up ate chu lalpa Ankuang uppi dinga mite chialtu gual ahi. Zia ziakachun Sacrament ahin Up ate leh Pastor te chun na asemkhawm uh ahi.

(e). A nau dang kit chu taksa lampang ahina chu a pawimaw tho, Biak-Inn vawp him lam leh vawpthiangtho lamte, Pathian lopina dinga cheimawite leh siamphat lamte ahi. Zia Kochuam vaihawm pawl, Pastor le panga a mawpuak nau ahi. Zia lo ah chun, Biak in cheimawi na ding thawlawm te, mi genthei thawlawm te, Pastor chawmna ding thawlawm te, a ngaitua diu ahin, zia hi upate na pawimaw taka hi. Pathian gam na ahin thagau lam na ahi.

(f). Upa ate na pawimaw ding kik chu Khawmpi chia hi ahi. Upate chu Kochuam khata pawimaw bep ahi puaua, Presbytery Khawmpi a te, Synod Khawmpi a te le Pastor te tawh vaihawm khawm sek dingte chu ahiu a, Khawmpi chia chu a thatham ding ahi puai. “Vaihawmtu upa” ti tak ah Kochuam siamtup na vaihawm hi a na pipen uh ahi. Thu ah Kochuam chawm lam kha chu Pastor Na pipen ding ahi. Upa Khawmpi a chia chun ama mimal min ah chia ahi pua, Kochuam min ah chia ahi.

(g). Upa nungchang.

Kochuam Upa nungchang ding pawimaw masapen chu, “Piangthak ta mi ahi ding ahi”. Piangthak lo chun Kochuam mamaw hetheilo ding ahi, Nikodem guala “Zia thil chu bangtin ahem ka hiatthei ding” ti mai ding ahi. Zia lo ah chun le pauchap zing mi ahi ding ahi. Kikhawmte taima taka enkawl pei mi ahi ding ahi. Kamtam lepna bawl law, mi du-am ahi ding ahi puai, Sia-leh-Pha thiatna thianga ginna thuguk pawm mi ahi ding ahi (Itim. 3:8-9). Kochuam nungcha hikhawlo theitu, Party lungthim te, khawvel lasakte, Khovel gualnawp bawl takluat na ate, Kochuam venghimtu ding ahi zia kin, a ki veng, aki sumthei ding ahi. Pastor tawh thuguk bangkim a genkhawm sek diu ahi. Kochuam kilkawina lam ah aki thugual diu ahi.

#### **KOCHUAM VAIHAWMNA.**

I. Khristian Zalenna chu khuahkhirna nuai a ahi sek. Khuahkhirna(khumbilna) nuai ah umlou te chu “Sapial e” iti sek ui. Ama um um ah umna hin, zalen tak ahi ngaipuau-zalenna phatak a umthei nan khuahkhirna(khumbilna) phatak nei a ngai a, ziazia kazhun, Kochuam Solkar hi khuahkhirna dan phatak leh Kochuam lampi zangtak siam dinga a um a kul ahi. Khristian te chu dan khawksa mi, dan guala khawksa mi ahi diu ahi. Ama thu ah um mai mai ahi ding ahi puai.

1. Khristian chu dan zawm mi ahiu.

Kaisar thil te chu Kaisar kianga pia unla, Pathian thilte Pathian kianga ape ta un”(Mt. 12:21). “Mitin a chung ua vaihawmtute thu thu in um uh hen(Rom. 13:1) “Lalpa zia ka chun mihing ki vaihawmna te chun kitulut uh hen” (IPet. 2:13).

Pathian thilte chu Pathian kianga piak ding ahin, Mihing kianga piak ding chu ahi puai. “Vaihawmtu hi Pathian guat ahi” ati ngei a, Pathian guat dan gual tak vaihawm a hawmlo ahi leh chun “Mihing thu sangin Pathian thu ka zawmzaw ding uh ahi” ti hi Jesu solchak te pau dan ahi(Solch. 5:29).

Vaihawmtu ten pathian thu bawtsia ah, mihiam dan siam khristian te chung a ngak tei a tup uh chun zia taka solchakte hi dan hi khristian te hi dan ahi zel ahi. Chutichun, khristian zalenna chu Pathian dawilam sunga ahin, pathian dawilo lam gual ah umkha chu zalenna ah a ngaipuau. Tulai in Pathian thu awilo gam ah le mihing dan siam mai hi a tawp ahi thei puai ti ahe thei tau a. India Solkar ahin le ama sakhua dawilam zosia chu dawidan dan biak leh thei dandan hi pun tup le phal ahi. Pathian chu chungnungpen ahin, a dawigual chu a chungnungpen bawk ding ahi.

2. Khristian zalenna chu eima nawp nawp ah um na ding ahi pua’n, Pathian thu banga um na ding ahi zawi. Mitin eima nawp nawp ah um ding hita leu hin, Khua leh tui ahem, kochuam ahem le umthei puana. Khawtang umdan dinga Pathian dawilam tapo kha a umdan ding uh chu ahi. Khawtang dan te kha Pathian dawilo zawng ahi chun a dodal ngam zaw diu ahi. Mi ama thu thu a um chun zalenna chu um theilo pai ziang ding ahin, ziazia kazhun pathian solkar vaihawmtute leh kochuam vaihawmtute le a guat ahi. Khristian in Solkar huai a um a nial ding ahi puan’n, a dawilam guala Pathian a biak theina kha solkar in



dal tei a guat chun mihing thu sangin pathian thu ka awi zawk diu ahi” ti kha a thugo lum dan ding ahi.

3. “Khristian zalenna” I ti hi mimal zalenna hilo in a pawlpi ah zalenna Kochuam zalenna ahi. Kochuam te chun a lalpau nuaia ama dan chu a siam thei ding ahin, ama lampi chu a gelthei ding ahi. Lalpa chun a min a pani ahem pathum ahem a kikhawp pi nau a chun umpi(pan) zel a tiam ahi. A lim ah patin, Khristian te hin a pawl ah thil hi ding hin a hiau a, pathian kianga pauchap zel in bangkim a semkhawm ua, Biak ina a pawlpi Pathian biak te leh Kochuam thubuai gel ding a khawmpi ko khawm te hi chanchinpha in a bul apat ahun pianpi him ahi. Tichun, pawlam thunei na’n zia hi dalthei puantin, Kochuam chu a lalpau nuai ah ama thu thu ah um ding ahi. Zia chu “Kochuam zalenna” I tiu chu ahi.

## II. KOCHUAM SOLKAR UM SAN.

Kochuam leh a nasep na um dan imu tak zosia ah khan Kochuam vaihawmna hi bang ahem a um san, aziak he thei hitiu.

(1). Khrista taksa siamphat nan (Eph. 4:12) ti ahi. Zia hi paul thumat nawp lam taka hi. Kouchuam tehi khrista taksa chu ahia, zia chu siamphat na dingleh patina dinging Pathianin bangkim agel ahi(a vaihawm ahi). Kochuam chu solkal gual ahin, zia chu bawl dingin Pathianin mi akoh sek ahi. Alim a pat, sawlchakte chu zilsakin, kipawlin Vaithum phelin, pauchapin, phatchuam ngaitakin zum him uh ahi. (Sawlchakte 2:42) ti ahi. Zia guala chun, Kochuam siamphatna hi Pathian guat ahin, Chanchinpha hin a lima pat ahung pianpi him ahi. Kikhawpte, Thulhilde, Vaithum phel te hi chanchinpha dan ahin, zia te khrista taksa siamphatna dinga pathian lemguat ahi. Thagau thiangtho kai huaina in, Kochuam nasep te chun, a lima pat zia nate hi a semzel ua, kochuam te chu ahung khang tul tul ah, ahung lian deu deu ta ahi. Tu tak hinle, khrista taksa chu lianpi ahi ta ahi. khawvel zosia huap ahita ahi.

(2). Panina chun, zia na ah chun Pathian in mi a kou sek hi. Khrista taksa siamphatna dinga na dangdang tamtak chu chang dingin pathian in mite a ko sek ti I hiui(Eph. 4:12-13). Kochuam na sem dinga pastor ahem, Upa ahem I gawi teu hi pathian ko ahi I ti sek ui. Pastor dinga kipete hin hanta nasatak ahem, kouna dang feltawk tak ahem, anei zia kun kipia ahisek ua. Zia gualachun, Pathian kona ahi iti sek uh ahi. Zia gual chu hilo ah, nek hawl na mai ding ahem, mite laka minphatna mai ding ahem ah min zia na hi a sep chun nuam asa ngai pua, a lawting ngailo ahi.

Kochuam Upate mani kipiakna taktak umlo maleh le a phatziak leh Pathian kochuam te a ngaisak zia kin, Kochuam vantang in a tel sek ua. Mipi lungthim ah Pathian in a Kochuam nasep te dingin, a kawkmua ah a tel uh ahi tin I ngai ui. Pathian ko mi tak hi in ihiau ahi. Zia gual chu hilo ah, politic party lungthim ahem, Kochuam chung vaihawm nawp ziaka kisala mai mi ahem, itel ahi chun, kochuam puipha puan tin, kochuam khansiat pha zaw hial ina. Zia guala Pathian in ana sem dinga mi a kou hi, Khrista taksa siamphatna ding ahin, kochuam puitu, chawmtu, dan siampiaktu, enkawltu ahin thutak ban leh kingakna ding ahi sek ui. Zia hi Kochuam Solkar, Kochuam vaihawmtu te ahiau.

(3). Thununna, Kochuam Vaihawmna um na sau chu a mite thunun ding ahi. Kochuam laka um diklo te chu hil akul ua, thunun angai ui. Paul in IKor. 5:1-7 ah agen gual akhan, “Kochuam vaihawm pawl te chun, a kochuam thiangthona dingin thuneina a mang ngam diu ahi. Amabochu, thununna hi hepi ah hi ding ahin, thunei zia kin mai ahi ding ahi puai. Misual chu a sim ah Kochuam ah ahung lut kit theina ding taphawt hawl ding ahi. Lal Jesu ziltilna, Mathai 18:21-22 thu kha hezing in, vaihawm ding ahi. Ngaidamna thu sagivei mai hilo in, sagivei mun sawmsagi tiang ah le mat thei ahi. Kochuam ah

ahung lut kit lona dingin, pawlam kua ma I khak khum thei puan, "Nawsua" iti hile a simkit vak thei zawkna dinga bawl ahin, "Paimang" tina ahi puan, thununna ahi.

#### **(4). Thugin dik vawptu ahi.**

Kochuam Solkar hi, Thugin dik tu-tu ahin. Mimal ahem, mikhenkhat, gindan chuam mi hung um taleh, kochuam vaihawmna chun enchain intin thunun ina. Min kochuam vaihawmtu te thu a pawm nawplo chun, a kochuam ua pan phal leh phallo theina a nei ahi. Zia gual mite chu a kochuam in a pai hilo in, amau in vaihawmtu te thu kha a dawu puau a, amau thu in zia kochuam laka chun a kikawichuam ah ngai ahi.

Kochuam mi gawi, Pastor ahem, Upa ahem gindan chuam nei chia kawu um taleh, kochuam vaihawmna sangzaw te chun enchain ina. A kochuam thugin pangai leh chiadan pangai tuplo ah ahiat uh chun, zil inau, thunun inau. A thunun uh anawplo chun Kochuam thumanglo ahin ama kipai ahi. "Kochuam thu le a awilo chun, nang din Jentel gual in um ta hen" (Mt. 18:17) ah ti ahi ngal ah.

#### **(5). Migenthei sawmdawl:**

Migenthei sawmdawl hi Kochuam vaihawmna achun a tup pakhat ahi. Khristian masapen ten Jerusalem ah Upa pasagi a telna zia tak uh kha le zia hi ahi. Kochuam in ama kochuam sunga, mi genthei te chu a ngaitua ngei ding ahi. Amabochu, migenthei iti hi kochuam pakhat sunga genthei pente tina hi khel lou in, chawmtu neilo ahem, natna leh vangsiatna tuaka semtheilo ama kituamlum zo talo tina ahi.

Paul in Juda gam ah Tam thuakte panpi dinga Makedonia gam leh Akai gam thawlom a dawl thute (II Kor. 9 ah) I mu, zia guala I unau genthei te hi chu I panpi him ding le ahi. Samaria mipha thu kha hezing in I Unau khristian te vangvang chu I panpi ding ahin, Kochuam vaihawmna ah le zia guala mi genthei thuakte chu hiatmil hilo ding him ahi. Zia guala mi genthei panpi (Sawmdawl) chu Kochuam na ahi.

#### **JESU KOCHUAM HOTU LEH LAL AHIZIA.**

(1). Kochuam chun a Lalpa hanta leh mapuina ah thil a bawl un a na chu api tin sek ahi. Khristian chu ama ngaidan maimai ah um ding ahi puan, a lalpa dawigual tapo chu a umdan ding ahi. Lal Jesu chun a min a pani pathum aki khawp nau ah chun umpi zel a tiama, Kochuam chu khawvel tawp tianga umpi a tiam ahi. Khenkhat chun "Vantang vaihawm Kochuam I hui" ti'n Vote ah vaihawm a tup sek ua, dik kimthei puana. Vantang in dawigual a telthei nau chu khrista thuthung sunga ahi ding ahi. Khrista dawizawng chu a bawtse ding ahi puai. "Vantang vaihawm" ti hi vantang lungthim mun khat putsak tupna ahi. Chun Khrista dawigual taphawt kha dan hi ding ahiziakin, min ama dawilam maimai suanthei hi puana. Kochuam dan a siam te le khrista dawigual le ahi ding ahi. Khrista dawigual leh Kochuam dan a kituak lo chun zia dan chu ding khawsuak puana. "Zia lungthim khrista Jesu ah um kha, nang mau a umtahn" ti ahi ngala. Khrista leh a mite chu munkhata (Thukhata) aluangkhawm diu ahi. Khrista chu Kochuam lalpaen leh hotu pen ahi ziakin Kochuam chun a dawigual taphawt a hawl diu ahi.

(2). Khrista chu Kochuam Lalpen ahiziakin pawlam thuneina in Kochuam sunga thu a nei ding ahi puai, ti alang. Solkar ahem, pawl in ahem, Solkar party in ahem Kochuam sunga thu anei ding ahi

puan, Kochuam in a Lalpau dawigual in ama dan chu siam in in a insung vai chu a vaihawm ding ahizawi.

(a). Kochuam thuneina, Solkar hin a chang leh Kochuam te hi pauchap dingin ahem a chial sek a, a chang leh thugen dan dingte leh genlo dan dingte le hun gel piak a tup thei a. Hitler in juda te a ngaisak lai un a khap a; Russia gam ah te le Sakhua a nei mai tilou uh chanchin kikopi chu a khap, kochuam chun Lalpa dan tawh kituak ah a hiat chun, Solkar thu guat te chu a lemtipi maithei a, maleh a lemtipi lo lam in Solkar in kochuam hi ding leh hilo ding a siam piak maimai thei puan, ama thu thu ahi.

(b). A chang chun, Solkar in Kochuam hotu tel ding te hi gelpiak a tup maithei a, (Mussolini inle pope tel aphal lo kha) “zia mi hi kochuam hotu dingin ala namdet un” tite ati mai thei ua, zia gual chu kochuam in a pawmtheilo him him ahi. Kochuam hotu ding chu kochuam in a kitel ding uh ahin, Khawmpi hotu ding chu Khawmpi’n atel diu ahi. bangkim ah kochuam chun a Lalpa dawigual a ngaichang ding ahin, pawlam mite thu’n umthei puana.

(c). Kochuam chun a mite thununna lam ah le thu anei ding ahin, solkar ahem, Lal in kochuam thununna chung a thu anei ding ahi puai. Lalpa chun a mite thunun dan ding a siampiak ah Bible ah muthei a, a pawl ah pang tak leh taklo ahem leh a mite hindan ding kawng bangkim kochuam in a gelfel ding ahi.

(d). Kochuam chun ama sum-leh-pai chung thunei, sawmakhat chu Lalpa chantum ahin, a petute chun Pathian kianga a piak uh ahi. Ziakiachun, Pathian nasepna ngei a mat ding ahi. Kochuam chun sum enkawltute anei seka, Kochuam enkawltute chun min Pathian a ding a piak chu Pathian nasepna ngei ah amang diu ahin, pawlam miten thu nei piakthei puana.

#### **4. Kochuam solkar umze dangte.**

Kochuam hi hun sawttak sunga hung dingdawk leh hung kisiam pha kawm zel ahin, aki vaihawm dante le ahung danglam zel ahi. Khristian masate hidan ziktung takin a chia thei pua, a kisiam phau a, a kisulam dang deu sek ua, ziakachun tulai ahin khawvel hin kochuam vaihawm dan dang (Chuamchuam) tamtak a umta ahi. Zia vaihawm dan dangte lak ah pawimaw deute chu neukhat han gen leu hin.

##### **(1). Congregationalism :**

Zia pawl hin, Baptist pawl hi a huapthei a, a gindan uh chu kochuam tin hi amau a ding chuam thei chiat ahiu a, a leng ua chung a khrista chu lal ahi atiu. “Ka min a pani ahem, pathum ahem a kikhawp nau ah chun pang zel ingka” tia lal Jesu’n a tep ziaka khan kochuam tin a khrista chu a um hi alanga, ziakachun kochuam pakhat in khrista bep lo chu hotu leh suan a nei thei ta puau, ti’n a ngai ua. Khawmpi vaihawm ahem le (kulin) pawimaw kulin ahe puau. Khaw chuam, amau a diu chuam thei chiat ziak mai uh chun kipumkhat lona ahi diak puai, atiu. Kochuam tin in ama a ki vaihawm a, amau in aki chuam chiat uh ahi. Zia chu khristian masate hin ahiau.

##### **(2). Roman Catholic :**

Zia hi Congregation te tawh aki galchan pen ahi. A hotu nei dan uh, Bishop lui in Bishop thak a namdeta(Ordained). Namdet tu in a namdetpa chung a len atup a khawpi mi in khawdang mite

chung len atup ua, tichun ahung ki Lal sak uh ahi ti ihiatsau ahi. Zia gual a chun aki ti akitiu a, kum zabi zali-zangana lam ah chun Rom khat bishop chu hotupen Pope, papen ati tau ahi.

Zia nunga chun, Pope chun thu a hung nei deu deu a, “Lei chung khrista thasangtu (Ai-awtu) ahi” tin kochuam zosia chung thuneitu ahung hita ahi. A kochuam solkar(Government) chu Pope solkar ahin, pope apat in hotu niamzaw te kianga thu aki thasawn zel ua, zia gual chun kochuam a vawp uh ahi. Zia hi alim apat kochuam kivawp dan ahi puai, kum zali-zanga nung a hung umdawk ahi, mi tamtak in Pope thunuai a um nuam loin a ki kawichuam tau ahi.

### **(3). Episcopal :**

Zia hi “Bishop nei mi” tina ahi, Pope thu dawilo te ki kawichuamna khat chu ahi. Church of England te, Orthodox te, Methodist khenkhat te leh Lutheran pawl khenkhat te hi Bishop nei chu ahiu. Bishop nei mi him him chu hotu sawngthum, Bishop, Presbyter, Deacon anei sek ui. A Kochuam solkar vaihawmna khawmpi ah gel ahi pua, Bishop thu ah um ahi. Khenkhat te chun Bishop in Kochuam a etkawl did an dan bu a siampiak sek ui. A hotu sawngthumna, Deacon atiu hi chu nazil gual bep ahiu a, Presbyter atiu ahin chu a kaisangto thei zel ui. Chun “Presbyter” atiu hi ei un “Pastor” iti gual uh ahi. A Kochuam solkar chu hotute hi ahiu a, khawmpi’n vai ahawm pua. Hotu kihokhawmte, dawichanga khawmpi kokhawmte bo chu anei sek ui.

### **(4). PRESBYTERIANNISM :**

Presbyterian chi hile tamtak ahiu a, ahi dan uh a kibang chiat puai. Hungary gam ah chun Bishop gual deu nei le a um a, a kawmpiu moderator khat detdeu ta a vawpte a um. Khristian masate kha I et chun Jerusalem Khawmpi a vaihawmtu te kha le “Solchak leh Up ate” atiu Solch. 15:6 ah. Thuthungthak kochuam Jerusalem leh Galatia gam vel mite kha chu Presbyterian dan tak hin a khawsa ngei ui. Methodist pawl khenkhat Weslian atiu hi Presbyterian ki kaivawp dan bang deu taka hi. Presbyterian huap sunga kawi maithei ahi.

Presbyterian chu Congregational bang deu in kochuam pumpi’n thu a nei ahi ti hi pawm chung in Ai-aw tu atel sek ua, dan zokim zosia’n vaihawm loin, a thasang tute chun a gelzaw sek ui. Bishop neite gual deu in namdet Pastor te kha hotu takin a nei ua, kochuam pakhat nuai ah a um ngai puau a. Bishop gual in thu anei ngai puau. Pastor te chu lalbik a um ngai puau a, aki kimchiat a ngai ahi. Kochuam up ate tawh vaihawmna ah chun aki kimtho ahi. Up ate sangin vaihawmna ah chun thu anei diak puau a, a vote uh aki kimchiat ahi.

Tichun, PRESBYTERIAN Kochuam hi chu Congregation leh Bishop nei mite ki kala lamlai a chia ahin, a kivawp dan teu hi a tuitum zaw ma ahi.

### **(5). KIZAWPKHAWMNA :**

Tulai khawvel khristian te lungthim a chun kipumkhat kiktupna hi a umdeu ta khawp mai a.

Lal Jesu’n “A leng ua pumkhat ahina ding un” tia a pauchapna kha hezing in Protestant kochuam hi kichuamna thamlo ahin ahi iki kawichuam hi. “Lalpa pakhat, ginna munkhat, Baptisma munkhat, bangkima Pa-leh-pathian pakhat” ati ahi ngala. Protestant khristian hi chu huangkhat ah umkit thei lehin chu phapen ding ahi tin khawmpi nate hial le a nei sek tau ahi. Kikawichuamna(dangdakna) hi

sap gam ah mite hidiklo ahin, gamthak lam ah mite vang chun chinding ahi puai, mi tawh iki tuak lona chiat hi kawimang in, munkhat a luangkawm ham hitiu, tin a kisakhawl nasa mamau ahi.

Protestant zosia hi pumkhat a umkikthei hi leh chu Lalpa khrista kipakna lamtak ahi le ginchak a um. Kochuam pawl chuam chuam te pumkhata um khawm in- "Khawvel pumpi Assembly" neitheh leh in chu lopi ngei mai ina.



**TUITHANAK DISTRICT  
(K.S.P).**

**ONE-DAY SEMINAR PROGRAMME**

15<sup>th</sup> March, 2013.

At **BISANMUAL  
PRESBYTERIAN CHURCH.**

**THUPI : “KOCHUAM ETKAWL DAN”.**

*-By. Rev. (Retd.) Haukham.*